

Regenza vul nova praschun per 107 milliuns francs

■ (cc) La regenza sustegna la construcziun d'in nov stabiliment serrà per l'execuziun giudiziala da 150 plazzas da praschuniers a Realta en la vischnanca da Cazas. Ella ha incumbensà l'Uffizi chantunal da construcziun auta d'organisar ina concurrenza da planisaziun per il nov stabiliment. Davart l'edifizi nov vegn il cussegl grond probablmain a decider definitivamain l'onn 2014.

In rapport strategic davart l'execuziun giudiziala en il Grischun, dal qual la regenza ha prendì enconuschientscha, mussa cleramain il basegn interchantunal d'in stabiliment serrà da questa dimensiun per l'execuziun giudiziala. Al concordat dals chantuns da la Svizra orientala davart l'execuziun da chastis e da mesiras mancan oz var 140 plazzas en l'execuziun giudiziala serrada. Uschia han ils concordats dals chantuns ils pli ferm populads Turitg e Son Gagl gia dà al chantun Grischun lur consentiments d'occupaziun nunliants en la dimensiun da circa 100 plazzas per 10 onns a partir da l'avertura dal stabiliment planisà a Realta. Er la confederaziun beneventa il project. Als custs da circa 107 milliuns francs vegniss la confederaziun a sa participar cun circa 33 milliuns francs. L'investiziun netta dal chantun importass pia circa 74 milliuns francs. Las dunsenas per ils praschuniers dal concordat dals chantuns da la Svizra orientala vegnissan a finanziar il manaschi ed a pussibilitar er la finanziaziun restanta da l'investiziun a favur da la construcziun.

Plinavant vegni quintà che Realta generass almain 80 plazzas da lavur novas. Sin fundament da la connexiun cun la Clinica psichiatrica Beverin sco er cun il stabiliment avert per l'execuziun giudiziala Realta è il lieu fitg avantagius.

Grazia a l'edifizi nov a Cazas po vegnir liquidà il stabiliment vertent dal Sennhof che vegn manà sco instituziun serrada a Cuira. Il stabiliment demussa oz differentas insuffizienzas da manaschi e differentas mancanzas da segirezza che pudessan vegnir schliadas al lieu vertent mo faschond gronds custs finansials e mo en moda nuncuntentativa. Ulteriurs basegns da spazi pudesan vegnir realisads al lieu actual – per mancanza d'ulteriuras pussaivladads d'engrondiment – mo en ina dimensiun fitg modesta e cun suprapostrar utilisaziuns. Per l'utilisaziun futura dal Sennhof ha la regenza incumbensà l'uffizi da construcziun auta da far in studi. Cun ina concurrenza d'ideas e/u d'investiders duain vegnir preschentads il potenzial economic, eventualas utilisaziuns alternativas sco er la realisabladad. Questa planisaziun vegn fatga parallelamain a la concurrenza architectonica per in nov edifizi per che la missiva da construcziun al cussegl grond possa cuntegnair ina clera deceraziun areguard l'ulteriura utilisaziun dal Sennhof.